

«Clau Scherrer pitescha cun Mozart, Brahms e Derungs»

Il venderdis ei Clau Scherrer vegnius undraus cul Premi da cultura grischun 2024 en siu vitg nativ Trun. Giovanni Netzer ha teniu la laudatio e caracterisau il musicist: «Clau ei musica.» Spel premi principal ha il president dalla regenza grischuna, cusseglier guvernativ Jon Domenic Parolini, era surdau sis premis da renconuschientscha e tshun premis da promoziun.



Il president dalla regenza grischuna, cusseglier guvernativ Jon Domenic Parolini, il purtader dil Premi da cultura grischun 2024 Clau Scherrer e Giovanni Netzer che ha teniu la laudatio per Clau Scherrer (da sen.).

FOTO HANS HUONDER

HANS HUONDER/FMR

Il Premi da cultura grischun ei la pli aulta distincziun per merets ella cultura ch'il cantun Grischun surdat. El fa quei mintg'onn cun ina fiasta, dapi entgins onns ella vischnaunca da domicil dil retschevider dil premi principal. Il venderdis ei quei stau il cass a Trun. Ina minuta naven dalla casa paterna dil purtader da quei premi, *Clau Scherrer* (47), ha la surdada giu liug, numnadamein ella Sala da cultura dalla vischnaunca da Trun. Hosps, famiglia, amitgas ed amitgs dil musicist han fatg honur ad el ed ein stai presents a quei mument festiv. Suenter il premi da renconuschientscha dil cantun Grischun igl onn 2016 ha el retschert il venderdis sera il Premi da cultura grischun 2024.

Clau Scherrer ha frequentau il gimnasi da musica ed il studi da musica a Feldkirch. Silsuenter ha el studigiau leu clavazin, pli tard clavazin e direcziun da chors a Basilea. Il mument eis el engaschus en ina mesa piazza sco menader dalla Scuola da musica Surselva. Sper quei engaschament eis el occupaus en biaras autras funcziuns. Las principalas: Dirigent dil Cantus Firmus Surselva, digl ensemble e chor d'Origen ni era duront in di ad jamna sco docent per chor ed ensembles vocals a Feldkirch.

«Clau ei musica»

La laudatio per Clau Scherrer ha *Giovanni Netzer* teniu. El ei sez purtader da quella pli aulta distincziun da cultura cantunala (2012) ed enconuscha il retschevider dil premi principal da cultura sco paucs auters. In tshuppel projects han Giovanni Netzer e Clau Scherrer realisau comunablamain, igl emprem avon 32 onns a Mustér. Clau Scherrer haveva 15 onns. «Il Chor viril Baseligia Savognin ei seprentaus en claustra a Mustér culas Soras Scherrer. Alla tscherca d'in organist hagi siu bab, Carli Scherrer detg: «Clau fa quei.» El ha buca detg Clau sa quei ni Clau fa quei bugen», relata Giovanni Netzer cun buca rienta. Sco sulet fegl dalla famiglia da *Sabina* e *Carli Scherrer* – leutier il giuven – ei Clau Scherrer seprentaus numerusas ga ensem cun sias soras, las Soras Scherrer.

«Tier la famiglia a Trun vegneva ei cantau en stiva e giun tshaler. Quei plascher per la musica ha infectau, era la famiglia che Clau ha cun *Rilana* ch'ei medemamein musicista. Clau ei musica. Duront ch'el diregia saulta el, senza ch'el sappi quei. Sia uvida ei enconuschenta. Suenter in concert sa el dir a mintga cantadura e cantadur nua ch'el ha tratg flad falliu ni ha giu in tun levamein falliu duront il concert», di Giovanni Netzer e constatescha: «El lai inspirar dil destin dils cumponists, enconuscha lur circumstanzias da viver e pitescha cun Mozart, Brahms ni era Derungs, fetg bugen era Bach. Il banal interessescha buc el, tonpli il sempel.

«Sco dirigent sun jeu mai persuls sin tribuna. Jeu sun dependents dils auters. Per quei motiv eis ei grev d'acceptar quei premi.»

Clau Scherrer,
purtader dil Premi
da cultura grischun 2024

Clau ei adina alla tscherca dalla verdad ch'ei davostier, suten ni denteren. Sia perscrutaziun musicala ei quella d'in misticher: El sa ch'ina grond'ovra d'art ei mai finida.»

«Grev d'acceptar laud»

En siu plaid d'engraziament pil premi e per la laudatio ei Clau Scherrer staus sco el ei: mudests. «Igl ei grev d'acceptar laud. Quei premi munta fetg bia per mei ed jeu sun engrazieivels per la laudatio. Enqual ga duront quella sun jeu denton era sedumandaus tgi che Giovanni Netzer manegi propi», di Clau Scherrer riend e puntuond: «Sco dirigent sun jeu mai persuls sin tribuna. Jeu sun dependents dils auters. Per quei motiv eis ei grev d'acceptar quei premi. Bugen partel jeu quel cun biaras e biars auters.» El ha enumerau in tshuppel persunas che han accumpignau el en sias activitads, en special ils confamigliars: «Mia dunna *Rilana* e mes affons che sustegnan mei co ei san e pon.» Mo el ha era buca tralashau da numnar sias ragischs a

casa culs geniturs *Sabina* e *Carli Scherrer* e naturalmein las quater soras: «Nus havein giu ina bellezza affonza. Las valurs – per exempel musicalas – che nus havein retschert sin viadi tgierein nus. Nus havein empriu da sefascinar per enzatgei.» Medemamein eis el sedrizzaus e siu laudatur Giovanni Netzer: «Jeu sun engrazieivels d'astgar separticipar a tias visiuns.»

«Il punct sigl i»

Il president dalla regenza grischuna, cusseglier guvernativ *Jon Domenic Parolini*, ha surdau il premi principal ed ils premis da renconuschientscha e promoziun a Trun. En siu plaid da beinvegni ha el puntuau: «Igl engaschi da biaras e biars, professiunists e surtut amatur, ei il fundament per la varietad culturala en nosas valladas. La cultura varionta segna il Grischun.» La varietad culturala semuossi era ellas activitads dils purtaders da premis da quest onn. Il president dil Cussegl grond, *Franz Sepp Caluori*, ei sefatschentaus dalla cultura en wikipedia per preparar siu plaid e constatescha: «Cultura ei quei che vegn fatg e formau dils carstgauns. Il Grischun ei fetg rehs da cultura e creativitat.» Exprimiu siu grond plascher dil premi pil convischin Clau Scherrer ha il president communal *Dumeni Tomaschett*: «Il premi che nies Clau survegn ei il punct sigl i da nies onn da fiasta per 600 onns *Ligia Grischa*. Negin ha meritau pli fetg quei premi ch'el. Nus essan loschs da Clau e sia famiglia.»

La surdada dils premis ei vegnida embellida musicalmein, denter auter da *Leander Albin* da Tersnaus che ha retschert in premi da promoziun per siu art multifar. Fatg honur a lur dirigent Clau Scherrer han era cantaduras e cantadurs dil Cantus Firmus Surselva cun in salid musical. Il premi da cultura principal ei dotaus cun 30 000 francs, ils premis da renconuschientscha e promoziun cun mintgamai 20 000 francs.

Sis premis da renconuschientscha e tshun premis da promoziun

Il president dalla cumissiun da cultura dil cantun Grischun, *Köbi Gantenbein*, ha honoraui siat persunas cul premi da renconuschientscha dil cantun Grischun e tshun persunas cul premi da promoziun.

Premis da renconuschientscha:

- *Angelika Abderhalden-Raba*, scenziada dalla natira, Zernez
- *Johann Clopath*, schurnalist ed autur, Trin
- *Yannick Frateur* e *Jessica Mehling*, musicists, Fidaz

- *Piera Gianotti*, artista, reschissura e pedagoga da teater, Bergaglia
- *Bianca Mayer*, musicista, Lumbrein
- *Vincenzo Todisco*, autur, Razén

Premis da promoziun:

- *Leander Albin*, artist multifar, Tersnaus
- *Krzysztof Barczynski*, fisicher ed astronom, Tavau
- *Svenja Gansner*, artista e formadra, Seewis/Basilea
- *Corinne Kälin*, saltunza, Grisch
- *Fabio Pola*, musicista, Brusio